

四庫全書

史部

欽定四庫全書

史部

浙江通志卷十二

詳校官給事中臣戴璐

檢討臣德生覆勘

總校官編修臣倉聖脉

校對官學正臣陳木

謄錄監生臣伍士鵬

欽定四庫全書

浙江通志卷十二

山川四

湖州府

烏程歸安二縣附郭

苕溪

太平寰宇記在烏程縣南五十步大溪是也

以其兩岍多生蘆葦故曰苕溪弘治湖州府志在

城西其源有二一發自天目山之陰金石鄉東至

安吉縣治南之邱渡又北至邱渡一發自獨松嶺

西聚衆山之水并浮玉山水折旋亦至邱渡二源

合而至於郡城之西一流入清源門內至江子匯

為雪水一流從清源門外徑趨釣魚灣沿濠至臨

湖門外合雪水入於太湖

戴表元苔溪詩六月苔溪路人看似若耶漁翁

挂棕樹酒舫出荷花碧水千塍共青山一道斜人間無限事不厭是桑麻

餘不溪

弘治湖州府志出天目山之陽經臨安縣

又經餘杭縣至安溪奉口經德清縣折而東北至

敢山過菱湖及湖趺漾又西北會前溪水至峴山

漾入定安門至江子匯為苔溪

前溪 弘治湖州府志在武康縣南出銅峴山東流
四十九里至武康縣前千秋橋名前溪一名餘英
溪按餘英志云春夏之交夾岍花開落英滿溪故
也其匯東至縣學前分為二派其一北流經黃隴
山之東至沙村號沙溪與德清縣北流水合入郡
之定安門經前溪匯為雪溪其一東流經下渚湖
之南會於餘不溪武康縣後又有一溪亦出自銅

峴山謂之後溪

北流水 弘治湖州府志在德清縣前其水從餘不溪至縣東分派折入清河橋下北流不沙村與武康前溪水合又北至峴山漾與餘不溪合入定安門至江子滙為雪溪

雪溪 太平寰宇記在烏程縣東南一里凡四水合為一溪自浮玉山曰苕溪自銅峴山曰前溪自天目山曰餘不溪自德清縣前北流至州南興國寺

前曰霅溪東北流四十里合太湖顧長生三吳土

地記云有霅溪水至深者徐陵孝義寺碑云清霅

瀾瀾深窮地根按字書云霅者四水激射之聲也

輿地紀勝自清源門入曰苕溪其流濁自定安門
入曰霅溪其流清弘治湖州府志即定安門內江

子滙是也其源從南來者曰餘不溪曰前溪曰北
流水三水會於峴山漾而入定安門從西來者曰

苕溪自清源門而入四水總聚於江子滙霅然有
聲故謂之霅溪又謂之霅川梅堯臣游霅溪詩共

愛霅溪風物美春來清可鑑鬚眉蘋生楚客將歸
日花暖吳蠶始浴時臨水竹樓通市陌跨橋雲屋

接川湄畫船載酒期君醉已是無謀任翦夷秦觀
霅工感懷詩七年三過白蘋洲長與諸豪載酒遊

舊事欲尋何處問雨荷風夢不勝秋周紫芝苔雪
舟中詩雲暗千家雨寒生兩岼秋水翻波入戶人
靚玉明樓山色遮愁眼荷香滿
客舟水晶宮裏客還作此生遊

白蘋洲 太平寰宇記在雪溪之東南去州一里梁
太守柳惲詩云汀洲採白蘋日暮江南春因以為
名

漕瀆 萬歷湖州府志即儀鳳橋下水晉咸和中都
督郗鑒開

貴溪浦 太平寰宇記在雪溪西南岼梁時有蘇氏

女於此遇一道士曰汝後大貴三年當有徵蘇氏
後適章氏生陳高祖宣后高祖即位拜后母為安
吉縣君因名

蘇公潭 太平寰宇記從貴溪東流三百五十步至
駱駝橋下曰蘇公潭此水深不可測中有蛟螭代
為人患唐開元初許國公蘇瓌子頤為烏程縣尉
郡守命督縣事因誤墜此直至潭底聞水中有人
語曰扶尚書出遂冉冉至水上畧無損溺有記見

在

芙蓉池

弘治湖州府志在郡城白蘋洲楊漢公所

開池中有千葉蓮

烏程侯井

萬歷湖州府志在府西吳孫皓為侯時

所鑿

烏程縣

城外山川

峴山

弘治湖州府志在縣南五里舊志云本名顯

山唐以廟諱改焉上有李適之石樽山頂有塔今

廢惟峴山寺僧宗義立菴居於其巔幽絕可愛萬

歷湖州府志山之首見者曰峴茲山首見於郭南

厥名允協上有三賢祠祀顏真卿蘇軾王十朋蘇軾

遊峴山詩苔水如漢水鱗鱗鴨頭青吳興勝襄陽萬瓦浮青冥我非羊叔子媿此峴山亭悲傷意所

同歲月如流星湛輩何足道當以德自銘鄭明選峴山宴陳太常詩七月峴山天氣涼風高乍雨湖

茫茫輕舟出浪若飛馬巨石滿岡如聚羊斗酒未覺主人薄高歌正宜秋日長窪樽遺跡至今在不

見昔賢空斷腸

道場山

弘治湖州府志在縣南十二里昔如訥和

尚經此山遂畱建寺山頂有塔下有伏虎巖瑤席

池其山峰巒秀鬱水石森爽殊為吳興佳絕古今

遊覽者皆萃焉

朱或可談湖州道場山有老僧言山在州南離方文筆山也低於他

州故未有魁天下者乃丐緣即山背建浮屠望之如卓一筆既成語州人曰三十年出狀元後大觀

賈安宅政和莫儔相繼為廷試魁蘇軾游道場山何山詩道場山頂何山麓上徹雲峰下幽谷我從

山水窟中來尚愛此山看不足陂湖行盡白漫漫青山忽作龍蛇蟠山高無風松自響誤認石齒號

驚湍山僧不放山泉出屋底清池照瑤席堦前合抱香入雲月裏仙人親手植出山回望翠雲鬣碧

瓦朱甍縹緲間白水田頭問行路小溪深處是何山高人讀書夜達旦至今山鶴鳴夜半我今廢學

不歸山山對酒空三嘆仇遠游道場山詩山行
龜背路羊腸伏虎禪師古道場老木陰中安御座
白雲堆裏撫僧床勺泉清徹涵秋味尖塔孤撐
界夕陽笑月亭空人影散松風和雨動天籟

錢山 烏程縣志在縣南十四里從衡山北出爲錢

山

黃潛登錢山望菰城詩吳興水爲州諸山若浮萍況此一培塿瑣屑世未名所欣漁樵居乃與

縉錫并種竹有萬竿結茅無十楹老僧解人意縱
履能相迎芳草被行徑朱藤按巖扃蕭條空堦暮
日照莓苔青猶嫌所歷早未極遊眺情聳身白雲
上始見春申城想當高會時樓觀飛青冥竭海薦
壘勺窮山羞鼎錮安知千載後寂寞無人行煌煌
冠蓋區攘攘狐兔瑩歸來朱門客聽此松風聲

車蓋山 吳興掌故在縣南七里形如車蓋

金蓋山 太平寰宇記在縣南十里晉何楷居此修

儒業後爲吳興太守改山爲何山

弘治湖州府志山與道場相接

最爲郡中諸山之勝遊者必以二山爲甲然道場

之勝在山巔何山之勝在山下故東坡詩有道場

山頂何山麓之句澄懷錄汪藻何氏書堂記云遊

道場

山者如入王侯之家其隆樓傑閣足以吞光

景而納江湖已而過何山則草樹蔥蒨軒窗窈窕

經行之地皆雅潔幽深如造高人隱士之廬至者

忘歸不知雄威移而爲清勝也石柱記箋釋何山

與道場

連接爲北一支金蓋山是南一支汪藻記

云東有道場西有何山金蓋固在道場之東南自

不容混

宇文公諒何山賦環苔陽之諸山蔚金蓋

兮深秀綠靡靡兮旁圍青遙遙而橫袞擅奇勝於

覽觀紛

應接於左右晉賢何楷於焉讀書爰守是

邦以游以娛山因之以得姓人已往而遺居是猶
墩之有謝溪之有冉者乎觀其修林蔽日羣峭摩
天表金峯以前拱擁青瑤而旁連步錦障兮雲麓
聆琴筑兮澗泉是雖地設實出天然靈祇獻瑞梵
宇扃禪閣流丹兮鳳翥瓦浮碧兮鴛連華鯨鏗以
響逸清磬發而聲圓挂元猿於蘿磴樓白鶴於松
烟若乃峯迴路轉繡錯綺縮道場之勝境實相屬
仰徹兮雲峯俯窺兮幽谷羅幡幢兮杳靄韻檐鈴
兮斷續巖花兮紛紅澗草兮駭綠信造化之鍾秀
實吳興之所獨蘇舜欽游雪上何山詩今古何山
是勝遊亂峯縈轉繞滄洲雲含老樹明還滅石礙
飛泉咽復流徧嶺烟霞迷俗客一溪風雨送歸舟
自嗟塵土先衰老底事孤僧亦白頭仇遠何山詩
溪轉峯迴一徑平田頭白水照人清寺因何氏封
山姓客把坡詩證地名蘿月長隨行道影杉風猶
帶讀書聲雲津橋下潺湲急僧濯袈裟客濯纓

軻山 吳興掌故在縣南十四里金蓋北出小支金蓋如車而軻附其旁也

衡山 左傳楚子重伐吳克鳩茲至於衡山杜預注

曰在烏程南衡古橫字通用

吳越春秋壽夢十六年楚恭王怨吳爲巫

臣伐之也乃舉兵伐吳至衡山而還

石柱記箋釋吳興志一名橫山

在縣南一十八里兩山夾峙中流北駛爲郡南形勝之地

鮑山 萬歷湖州府志在縣南九里

黃蘗山 太平寰宇記在縣西南三十五里

葛仙山 萬歷湖州府志在縣南五十里職方圖志
云葛洪煉丹處天下十有三烏程居其一

菁山 黃潛菁山普明寺記由湖郡城南渡溪舟行
四十五里登陸又二里許是爲菁山泉清水深峰

巒峭拔巖壑鬱紆最爲勝處名勝志其上生黃菁

故名張羽菁山石梯閣夜坐詩每逢晦日驚春盡
爲俯高窗對夜分獨鶴夢酬西崦樹老僧定

入上方雲泉聲落澗空中辨花氣穿林暗
裏聞莫道暫時畱愛賞移家終擬避塵氛

吳嘯山 晏公類要在縣西南六十六里吳興記曰

嘯燒山爲田故名

太平山 烏程縣志在縣西南五十一里

馬鞍山 萬歷湖州府志在縣西南七十里與武康

接界

銅山 萬歷湖州府志在縣西南九十五里一名銅

峴山 吳採鄣山之銅於此西隸安吉南武康

莫干山 嘉靖浙江通志在縣西南一百五十里上

有鑄劍池水常清澈旁有磨劍石世傳吳王鑄劍
於此取莫邪干將之義以名

棲賢山 萬歷湖州府志在縣西二十二里舊傳有
高士曾隱此

西塞山 經鋤堂雜誌吳興南門二十餘里下菰菁
山之間一帶遠山爲西塞山山明水秀真是絕境

皮日休西塞山詩白綸巾下髮如絲靜倚楓根坐
釣磯中婦桑村挑葉去小兒沙市賣蓑歸雨來蓴
菜流船滑春後鱸魚墜釣肥西塞
山前終日客隔波相羨盡依依

杼山 名勝志杼山高三百尺週一千二百步陸羽

記云夏后杼巡狩之所亦名稽留山

僧皎然有杼山禪居寄吳

處士
筠詩

九乳山 晏公類要在縣西南三十里張元之山墟

名云山有九峰狀如乳

石城山 太平寰宇記在縣西南三十里張元之吳

興山墟名云昔烏程豪族嚴白虎於山下壘石爲

城與呂蒙戰所今山上弩臺烽火樓之跡猶在

夾山 名勝志在縣城西南十里下有夾山漾

小敷山 吳興掌故在縣西南二十里談志名福山

唐人沈下賢亞之居此

戴表元小敷山記敷山匝於吳興十有餘里山中卷

外截水巖折行平原茂樾間左右之徐山杼山挾敷山而蹲敷山之前蒼峭再連圭起簾伏望而知

爲美壤也

謹按唐杜牧弔沈亞之詩一夕小敷山下夢水如環珮月如襟即此

法華山 石柱記箋釋吳興志太平寰宇記謂之石

斗山王羲之所游處梁尼道蹟號總持得法於達

摩晝夜誦法華經後歸寂即葬其處

蘇軾游法華山詩具區吞

滅三州界浩浩湯湯納千派從來不著萬斛船一
葦漁舟恣奔快仙壇古洞不可到空聽餘瀾鳴淵
泝今朝偶上法華巔縱觀始覺人寰隘山頭卧碣
弔古塚下有至人僵不壞空餘白棘網秋蟲無復
青蓮出幽怪我來徙倚長松下欲掘茯苓親洗曬
聞道山中富奇藥往往雲芝雜葵薤詩人空腹待
黃精生事只有長柄械今年大熟期一飽食葉微
蟲真癯疥白花半落紫穗香攘臂欲助磨鎌鋤安
得山泉變春酒與
子一洗尋常債

白鶴山 太平寰宇記在縣西北二十六里山謙之

吳興記云昔烏程人姚紵化爲白鶴游於此山因

名

弘治湖州府志吳興記云山石精好不讓吳興即此也吳江東記云員邱山石精好不讓吳興即此也吳

中

白鶴山

詩吳興多名山茲峯特奇秀不知自

開

闢陰陽幾昏晝云有赤髭僧窻棲刻蓮漏香臺

儼

有在禪室已新構松下伏神龜竹間走饑鮑白

鶴

不受招仙踪亮難究伊昔屢登臨空翠濕衣袖

窮

摻不知疲幽討寧嫌逗巖扉與澗戶

一

一爲重叩和詩寄山靈餘生敢多又

西陵山

吳興掌故在縣北二十一里吳太子和葬

此子皓繼統追尊文皇帝陵曰明陵以其在西名

西陵

仁王山 名勝志在縣西北九里一名鳳皇山其南

一小山曰礪山

溫山 萬歷湖州府志在縣西北三十里山出御薊
卞山 弘治湖州府志在縣西北十八里高六千尺
周處風俗記旱山當作冠弁之弁以山形似弁也
唐顏真卿石柱記韋明歆登卞山詩皆作卞字其
山西北屬長興縣山有黃龍洞石壁峭立巖竇陰
沉莫窮其底旁有黃龍祠祥應宮郡有水旱禱焉
蘇東坡有詩刻又有三賢祠其沈家洞避洞亦在

焉

互見長興太平寰宇記郡國志作卞和採玉處非也周處風俗記云當作冠弁之弁徐陵孝義

寺碑云高升蒼蒼遙聞天語雲林石譜弁山在郡最爲齒萃產石奇巧羅布山間葉少蘊蓋堂以就

其景故號石林范成大與吳興薛士隆使君游弁山石林先生故居詩白蘋有嘉招蒼弁得勝踐會

心不憚遠乘興恐失便籃輿犯窮臘共作忍寒面溟濛雲釀雪浩蕩風落雁松篁漸清幽猿鶴或悲

怨英英文章公作舍鎖蔥蒨峴峯俯前榮佳木秀諸院窮搜發山骨林立侍談讌西巖踞熊虎東巖

峙屏案履綦故彷彿益瓦已零亂經營三十年成毀一飛電摩抄土花碧小立爲三嘆趙孟頫游弁

山詩我欲到斯境歲月良已深今晨爲茲游酬我夙昔心悠悠岡版長慘慘風雲陰微雨迫短日飄

然灑衣襟屢欲還吾駕去意復難任消搖得所止林竹自蕭森素琴不須彈山水有清音邈在樊籠

外塵想何由侵况懷冥絕理出此
將焉尋他山豈不好聊爾非所欽

玲瓏山

癸辛雜識在卞山之陰嵌空竒峻畧如錢

塘之南屏及靈隱之鄉林有洞曰歸雲張謙中有

篆書於石梁濶三尺許橫繞兩石間名定心石旁

有杜牧之題云前湖州府刺史杜牧大中五年八

月八日來又紹興癸卯葛曾卿林彥政劉無言莫

彥平葉少蘊題名

石柱記箋釋石林在卞山之陽
宋葉少蘊之所居即玲瓏山沈

與求游玲瓏山因訪朱氏草堂詩平生丘壑心餘
事不掛目藜杖南山來要使富幽矚異哉小玲瓏

蟠峙蒼弁腹修藤結懸崖飛溜響空曲伏石卧虎
狀騰弩雜奔鹿呀然牙吞吐側路劣容足拂拭古
薛紋字刻翳新綠標榜玲瓏名奇怪殆天屬捫蘿
上絕頂坦坦若平陸俯首瞰來蹤穹然在幽谷傳
聞昔逋客誅茅此營屋清魂不可招千載想遺躅
我思造物巧妙供游人錄揮斥役山祇斷此一拳
玉雲窗與霧閣一一相亘屬豈無部曲衆猿鶴即
更僕豈無節旄貴松檜自張纛此事久棄置蛛絲
網巖麓翩翩佳公子心古韻不俗駕言脫華簪茲
馬卜幽築終日面噴吼世故豈容觸指點空洞姿
喜氣政堪掬挾杖校昔游健步念須續亦有招隱
詩薄暮不可讀章良能游玲瓏山詩短鍾長鑱出
萬峯鑿開混沌作玲瓏市朝可
是無崎嶇更向山林巧用工

賽玲瓏山 崇禎烏程縣志去玲瓏二里有三石竅

可進入者以燈行一二里即返洞中有泉滴下懸
崖繡壁亦奇觀也沈氏挾別爲之因名沈家洞

蜀山

吳興掌故在縣東十里

高啟送徐貴蜀山幽居詩我因解散遠辭

京君爲修琴暫入城偶爾相逢春酒熟飄然忽去
暮烟生山頭學嘯猶聞響世上留詩不寫名西澗
煩詢張靜者年來著易幾交成

西余山 太平寰宇記在縣東十八里路史輿地志

漢文封東海王搖之子期視爲顧余侯今昇山東
有西余山是也

孺山 太平御覽東遷縣有孺子山徐孺子入吳常

登之因以爲名

吳興掌故在縣東二十八里漢徐孺子哭友人姚元起於此山下有

孺子

祠

謹按晉書地理志太康八年分烏程立東遷縣至隋開皇九年廢入烏程

戴山 吳興掌故在縣東北十八里譙郡戴顓遊此

三吳太守張邵素與之善爲築室於此因名焉顏

魯公癸亭詩旁瞻戴顓路蓋指此山也

張羽游戴山詩譙國

有高士寄志在絲琴一聞王門名破琴絕其音傳昔居斯山井竈邈難尋至今草木間清風肅虛襟

予家依古跡結屋當東林擇里得所安懷賢思難
任浮屠巧眩世廟廊冠其岑臺殿紛青紅僅足供
登臨誰能構芳宇蘋藻薦所欽相望孺子廟千古
同此心徐賁登戴山詩平田渺空曠孤岡忽高峙
新松蔭其巔白石繚其趾初登若嶄絕稍上乃如
砥巖風蕩高寒微月中宵起亭亭日晷側肅肅征
鴻馱南搖天目雲北覽具區水比來局羈絆遊遨
喜茲始同心良可重歡言得佳士非惟外累遺沉
憂亦咸委薄暮聊
旋歸餘興會畱此

昇山一名歐餘山

太平寰宇記在縣東二十里入東記

云晉王羲之常昇此山顧謂賓客曰百年之後誰
知王逸少與諸卿遊此乎因有昇山之號歐餘漫

錄歐餘即今之昇山楚封越王句踐之後爲此亭

侯子孫遂爲歐陽氏詳見文忠公行狀

張羽遊昇山詩

橫道旁秀色佳有餘雖微千仞岡層巒自縈紆右
軍晉高士曾此眺郊墟苔徑存遺蹟千載沒荒蕪
想當登臨日俯仰凌八區放浪形骸外遊目多所
娛惜無登高作儷彼蘭亭書我思見其人臨風一

踟躕

別鮮山一名烏山

弘治湖州府志在縣東十三里孤秀

不相連屬因名焉爾雅曰小山別大山鮮郭璞注

云不相連也唐高士沈聘沈徵居之石柱記箋釋

談志昇山一名烏山古烏巾氏所居也今縣東八里有烏山一名別鮮山爾雅疏云不相連屬者山上有烏亭舊址即今烏巾菴梁吳均同柳吳興烏亭集送柳舍人詩即此山非昇山也

毗山 吳興掌故在縣東北五里當城北水入太湖

突然獨峙吳興之水口也

西吳里語山海經云浮玉之山北望具區東望

諸毗郭璞注云諸毗水名也續圖經云浮玉在西南毗山在東北與山海經協璞不知此山耳

小雷山 崇禎烏程縣志周處風土記云太湖中有

大雷小雷二山相距六十里舊編云小雷洞庭之東屬烏程大雷洞庭之西屬長興

黃龍洞 輟耕錄在吳興郡北去城闔廿里枕太湖其山皆怪石林立洞旁壁立千仞頻瞰不能見底每歲旱郡民禱之黃山谷書黃龍洞三字刻猶存

蘇軾黃龍洞祈晴詩吳興連月雨釜甑生魚蛙往問并山龍曷不安厥家梯空上巉絕俯視驚一呀神井湧雲蓋陰崖垂鮮花交流百道泉赴谷走羣蛇不知落何處隱隱如綠車我來扣石戶飛鼠翻白鴉寄語洞中龍睡味豈不佳雨師少弭節雷師亦停撾積水得返壑稻苗出泥沙農夫免菜色龍

亦飽豚獭看君擁
黃紬高卧放晚衙

卷十二

碧浪湖 西吳里語一名峴山漾在郡城南羣山四

匝諸水匯聚嵐光林影掩映上下

徐賁泛碧浪湖詩邀客泛流槎

開尊對渚沙
亭袍沾杏雨
蘭棹撥蘋花
積水添湖滿
遙山抱郭斜
閒情遂幽賞
聊用答年華

太湖 名勝志在府城外十八里界於烏程長興之

間其大三萬六千頃東西二百餘里南北一百二

十里周五百里西北極於宣常東北極於蘇湖大

雷小雷二山皆浮於湖之東方屬當郡境蓋浙西

苕霅與臨安廣德諸水散出凡七十二溪奔海不
及則停蓄於湖道三江以入海禹貢謂之震澤周
禮謂之具區左傳謂之笠澤其實一也太湖亦名
五湖張勃吳錄云周行五百里故曰五湖陸魯望
云太湖上稟咸池五車之氣故一水五名然太湖
雖環繞江南數郡其以之名州者則獨吳興爲然
李願太湖詩旋經義興境頓擢石蘭渚震澤爲何
在今惟太湖浦圓經縈五百盼目渺無覩高天水
若岸長津雜如縷窈窕尋彎碕迢遞望巒嶼驚飈
揚飛湍浮霄漾懸岵輕禽翔雲漢游鱗憩中許黯

靄天時陰嶢峇舟航舞馮河安可狷靜觀戒行旅
王昌齡過太湖詩水宿烟雨寒洞庭霜落微月明
移舟去夜靜夢魂歸暗覺海風度蕭蕭聞雁飛楊
基過太湖詩天帝何年遣六丁鑿開混沌見雙清
湖通南北澄水鑒山斷東西列畫屏掩雨龍歸霄
漢暝網魚船過水雲腥乘風欲往終吾老角里先
生在洞庭

凡常湖 弘治湖州府志在縣西二十七里

合溪 嘉靖湖州府志水出懸腳嶺合白峴諸山之
水爲楊店澗又出蒼雲嶺爲梓方澗二水匯而爲
合溪南經竹山潭又東經罨畫溪入長興西南門

又東出東門又東北經趙瀆入太湖

四安溪 嘉靖湖州府志水出石澗諸山南經盤澗塘又南經善岬塘與廣德水合又出廣德諸山東經荆塘又東經塔水塘又東經善岬塘與石澗水合二水東過四安鎮大德橋又折而南出下殷橋入龍溪與茗溪水合

黃浦 弘治湖州府志一名黃蘗澗在縣西南二十八里其源出黃蘗山吳興記云春申君黃歇於吳

金方輿記卷十二
墟西南立菰城縣起青樓延十里後漢司隸校尉
黃向於此築陂溉田宋鮑昭有黃浦亭黃浦橋送
別詩又名庚浦即康浦也晉殷康爲太守百姓避
其名改康爲庚

掩浦 名勝志在城東北二十六里一名項浦秦始
皇東游會稽項梁與籍私往觀之籍曰彼可取而
代也梁掩其口曰毋妄言族矣因以名其浦

青塘河 弘治湖州府志在烏程縣北三里迎禧門

外吳景帝鈕皇后父葬弁山令百姓開之以通葬
所梁太守柳惲重濬亦名柳塘又名法華塘自城
入法華山寺路也

蒲帆塘河 萬歷湖州府志在縣北二里唐刺史楊
漢公開時塘中得蒲帆故名

謝塘河 太平寰宇記在縣西四里晉太守謝安開
釣魚灣 弘治湖州府志在縣西三里古稱張志和
釣魚處

蘇灣 烏程縣志在縣南峴山寺前碧浪湖之西其

堤爲蘇軾治郡時所築故名

張羽蘇灣詩羣山抱高城明湖湛清秋迴

岍曲如月橋橫雲木幽聞昔長帽翁曾來守茲州時清吏事簡公暇輒出遊揚舲度南關振衣臨清

流濟濟文翰侶臨觴更獻酬賦詩屬篇章自是謫仙儔斯人沒已久餘迹幸未休至今此處地名爲

蘇灣頭先生天下士真氣如雲浮如何羣小戚戚方見讐玉堂非吾榮儋耳非吾憂肯將百鍊鋼

化爲繞指柔我來弔其魂塞芳向長洲舉觴酌明月日暮風颼颼陳行健游蘇灣詩選勝何年足青

山帶水奢秋生雙槩外雨過片雲斜翡翠澄湖烏金燈野岍花幾人能好事石畔泛流霞

官瀆 嘉靖湖州府志在縣西二十七里

夾山漾 弘治湖州府志在縣西南九里

大苞漾 小苞漾 弘治湖州府志俱在縣東北一

十五里

衡山漾 萬歷湖州府志在縣南七都

謝村漾 烏程縣志在縣東南三十里以謝靈運故

宅名

真珠泉 弘治湖州府志在烏程縣西南二十五里

妙喜寺 東北方丈餘其泉清澈觀者以足震地則

卷十二
泉中細泡連起如珠故名

虎跑泉 一掬泉 萬歷湖州府志俱在道場山

浮玉山 嘉靖湖州府志在峴山

金井泉 萬歷湖州府志在黃龍洞山頂

上智潭 萬歷湖州府志在烏鎮旱不乾澇不溢舊

常有神龜出沒

歸安縣

城外山川

浮玉山 趙孟頫吳興山水清遠圖記在城南三里

玉湖中巨石如積坡陀磊砢葦藂馬不以水盈

縮爲高卑故曰浮玉

徐賁游浮玉山詩浮玉山前路樓船泊渚沙蘋香風際草

杏色雨前花間鳥兼湖淨游絲趁岸斜不因來此處那得賞春華

河口山 吳興掌故在縣東南五里初學記河口山

東濱大溪西帶長瀆

長超山 名勝志一名湖跌山

一作跌

在城東二十五

里上有漢鮑子訓遺蹟

含山 名勝志在城東南九十里山上有含山寺及

浮圖山墟名云震澤東望蒼然茭葦烟蔚之中高邱卓絕者此山也

獅子山 吳興掌故在縣西南一百五里首枕大溪岡隴盤跼如狻猊北屬武康

東林山 弘治湖州府志在縣東南五十四里突兀於菰蒲溪泊之中峯巖如繡又名具錦峯上有塔下有祇園焉吳興掌故宋沈東老隱此

顧應祥眺遠亭記去

湖城南二舍許有山曰東林世傳回仙顯蹟之所

謝家山 萬歷湖州府志在縣南五里

侯石山 萬歷湖州府志在縣南六里

厥山 吳興掌故在縣東南七十里吳均入東記云
吳文士陸厥家於此山

馬鞍山 歸安縣志在縣西南七十六里

桃花塢 歸安縣志在縣西南五十里

菱湖 唐書地理志縣東南三十五里有陵波塘寶

歷中刺史崔元亮開弘治湖州府志菱湖即陵波

塘也其地產菱故名

趙金過菱湖詩去餘不路
遨遊一問津村孤船作市地

絕水爲隣菱藕官租足魚蝦野
饌新衆山遙映帶相對碧嶼

小溪

弘治湖州府志即施渚溪在縣西五十四里

思溪

嘉靖湖州府志在縣東南三十五里

練溪

歸安縣志在縣東南八十里溪流如練故名

花溪

萬歷湖州府志在縣東南七十里一名花城

寶溪

名勝志在城東南四十五里一名射村溪昔

有漁者見溪上有光伺之見一大蚌乘風而行光

從中出逐之即沉

長興縣

雉山 弘治湖州府志在縣北五里以山形類雉唐
置雉州因山名也萬歷湖州府志梁武帝時童謠
云烏山出天子江表凡以烏名山者咸鑿之惟雉
山失鑿而陳武帝生

呂山 吳興掌故在縣東南二十里吳將呂蒙討山
賊嚴白虎屯營於此

鼓吹山 吳興掌故在縣西北二里陳文帝居鄉時

縣令到仲舉聞縣後鼓吹聲則帝必至因名

弘治湖州

府志舊志云西北可望陳后陵墓歲時祭享鼓吹相聞以此得名

橫玉山 弘治湖州府志在縣西北三十五里望之

蒼碧如玉故名

香蘭山 弘治湖州府志在縣北三十五里東枕太

湖多生蘭蕙

金蓮山 長興縣志在縣北一里

陽烏山 長興縣志在縣東七里陳武帝祖道巨墓
在此

戍山 萬歷湖州府志在縣西北二里吳築戍城其
上梁太守張嶮與中丞沈峻築城捍侯景明元帥
耿炳文點軍於此俗因呼爲點軍山

五峯山 名勝志在縣西一里

龍目山 吳興掌故上有石巖中有二穴其光可鑑
所謂龍目也過嶺爲廣德州界

望山 萬歷湖州府志在縣西南六十八里形如覆
舟觸石有空洞聲

白峴山 長興縣志在縣西北八十里山多白石望
之如雲凝雪積上有南北二嶺

方山 吳興掌故在縣西南四十里高四千丈陳文
帝爲信武將軍自長城遣二千人夜下方山津即
此

鳳亭山 長興縣志在縣西北四十里

藝香山 太平寰宇記一名湖陵山在縣北十五里
西施種香之所

赭石山 萬歷湖州府志在縣西北五十里山多赭
石登者若升絳霄

西顧山 太平寰宇記在縣北四十九里又名吳望
山闔閭登姑蘇臺望五湖西見此山故名

堯市山 吳興掌故在縣西北四十里吳興山墟名
云堯時洪水居民於此山作市皎然詩堯市人稀

紫笋多即此

揚維禎堯市山詩丹房夜宿庚桑洞古井重詢堯市山聽猿老樹垂雲白

飲馬清泉錦石斑野婦採桑成隊出山童沽酒滿瓶還顧渚橋頭有船賣尋詩直叩碧桃關

吳山 西吳里語在長興南四十三里梁吳均卜宅

唐吳筠又居之山下有溪名吳山灣昔吳王送女至此有潮高三尺倒流七十里名吳王送女潮

浮雲山 長興縣志在縣西南六十里

八座山 吳興掌故在縣西南四十里唐吳珙吳頊

吳崧皮光業林升羅隱韓必何肅居此時號八友

因名

九龍山 長興縣志在縣西南一百里

菖浦山 舊浙江通志在縣西七十里胡一松隱居之所

四安山 吳興掌故在縣西南八十三里

青峴山 吳興掌故在縣西六十里陸羽云啄木青

峴茶味與壽州同

金山 萬歷湖州府志在縣西四十里晉樓船將軍

金曼倩居此石皆丹色

白鹿山 萬歷湖州府志在縣西三十里又名巖山

闔閭時白鹿見故名

飛雲山 太平寰宇記在縣西二十里山南有風穴

雲霧不得鬱積其間宋元徽五年置飛雲寺有石

泉沙渚松門苦竹巖

閬山 萬歷湖州府志在縣西十五里山多竹有竹

山潭竹山寺

大腹山 萬歷湖州府志在縣西十里一名伏虎山
有姚崇墓

茶磨山 弘治湖州府志在縣東南二十一里形類
茶磨故名

青山 弘治湖州府志在縣南六十里山墟名云山
有巖竇通洞庭冬夏常煖山色如黛故名

所射山 吳興掌故在顧渚山左

互通山 萬歷湖州府志在縣西北七十里山甚高

大有四十八隴有羅芥產茶甚珍之有二龍池二

仙洞

顧渚山

即茶山

方輿勝覽茶山在長興縣西產紫笋

茶萬歷湖州府志山在縣西北四十七里西達宜

興吳大槩顧其渚宜茶後其產果然乃充貢下有

貢茶院傍有金沙泉甚美山中有明月峽絕壁峭

立大澗中流其茶所生尤爲異品

杜牧春日茶山呈賓客詩笙歌

登畫船十日清明前山秀白雲膩溪光紅粉鮮欲
開未開花半陰半晴天誰知病太守猶得作茶仙

西噎山 崇禎長興縣志在縣西北六十二里以其
澗泉峻激有聲如噎故名

大官山 小官山 萬歷湖州府志在縣西北四十
五里顧渚之側其左右諸山或專藝茶或伐爲薪
炭此二山林木深茂樵蘇不及大官頂有虎頭巖
狀如呀嘯下有石門可往來有張塢產茶爲羅芥
之次

南川山 萬歷湖州府志在縣西北五十里跨南北

二川

菹中山 吳興掌故在縣西北二十五里在忻湖之

西

徐富山 萬歷湖州府志在縣西北二十里宋熙寧時富民徐隆居此以富得名

義鄉山 吳興掌故在縣北六十里晉太守周玘舉義兵平石水陳敏等賊割長興西鄉立義鄉縣於陽羨以此得名

大雷山 石柱記箋釋洞庭之西山屬長興

弁山 萬歷湖州府志在縣東南四十里西北之半
隸長興東南之半隸烏程山陰多奇石玲瓏又產
諸藥品每土中掘得前代殘碑斷石又有似玉之

石其勝景莫如碧巖

葉夢得弁山詩山勢如冠弁相看四面同歸烏縣門近苔

雪水源通白鶴嶺盤峻黃龍洞竅空登臨舒老眼何用到崆峒趙孟頫遊弁山詩二首出郭聞鶯語穿林散馬蹄澗松何鬱鬱春草又萋萋白石那堪
煮丹崖尚可梯平生愛高興只合此幽棲竹色迷
行徑松聲洶座隅水清花自照風暖鳥相呼飲罷
思棋局歌殘缺唾壺重來瀟洒地聊足慰須臾

小玲瓏山

駱鸞錄雲川有兩玲瓏山石林爲大玲

瓏又有小玲瓏在長興縣界路口洞穴數十旁相

通貫襍積嵌巖巧怪萬狀

范成大自石林回過小玲瓏詩一邱乃中虛洞

穴四無礙却畧巖岫杳黝糾石狀怪蒼牛飲前池

碧潄灩微瀨雕鏤具百巧圖畫窮千態哀湍瀉壞

磴凍雨濕空翠踈梅照草棘瘦竹拔蹊隧當時閭

閭子目力在塵外孤童藐難料奇事疑有待誰與

千金捐來換把茅葢不仙亦足豪衆垤皆累塊我

評北山游絕勝此無對玲瓏詎可小孰能爲之大

烏瞻山 長興縣志在縣西三十里名勝志其地迥

絕五峯突出若羣鳥之瞻視於雲表又云昔烏子

瞻避難於此山有南北二菴絕頂爲彈子岡相傳
陳武帝放彈處

夏駕山 嘉靖湖州府志在縣東南三十六里夏后
杼南巡至此故名上有石鼓高可丈餘又名石鼓
山舊傳此山鳴則三吳有兵

獨姥山 崇禎長興縣志在縣東五十里踞太湖之
濱一名別峰山

黃鵝岡 太平寰宇記在縣南六十五里

明月峽 吳興掌故與顧渚聯屬絕壁峭立於大澗
中流亂石飛走茶生其間者尤爲絕品張文規所
爲明月峽中茶始生是也

啄木嶺 吳興掌故在縣西北六十里山多啄木鳥
槍旗嶺 弘治湖州府志在縣東南三十里弁山上

石多槍旗所植之竅俗傳霸王屯戍之所嘉靖浙
江通志蘇子瞻云世謂茶之始生而嫩者爲一槍
寢大而開者爲一旗王介甫送元厚之詩云新茗

齋中試一旗是也此山舊亦產茶而嘉故曰槍旗

胭脂嶺 弘治湖州府志在縣西南六十里上槩村

西唐天師吳筠鍊丹之處至今土色如胭脂

蒼雲嶺 弘治湖州府志在縣西六十里林木秀蔚

狀如蒼雲合溪之源出焉

西湖 唐書地理志長興西湖壅塞貞元十三年刺

史于頔復之又呼于公塘

詳見水利

忻湖 崇禎長興縣志在縣北七里周二十里溪山

清勝菱芡之下鴛鴦交集可以游泳

菴畫溪 弘治湖州府志縣西八里廣二十五弓古

木夾岬叢篠翳其下朱籐施其上故名長興縣志

一名西溪

劉燾遊菴畫溪詩竹林深處杜鵑啼兩岬青青草色齊欲識人間真菴畫朱籐

倒影入清溪

箬溪 太平寰宇記在縣南五十步一名顧渚口一

名趙瀆注於太湖箬溪者顧野王輿地記云夾溪

悉生箭箬南岸曰上箬北岬曰下箬皆村名村人

取下箸水釀酒醇美勝於雲陽俗稱箸下酒石柱

記箋釋源出合溪在畫溪下流至於箸寺會南溪

諸水從新塘入太湖

僧皎然箸溪春興詩春生箸溪水雨後漫流通芳草行無

盡清源去不窮野烟迷急浦斜日
起微風數處承流望依稀似剡中

餘罌溪 弘治湖州府志在縣東南二十三里溪上

有餘罌村

合溪 萬歷湖州府志在縣西二十里

詳見烏程縣

環沉溪 崇禎長興縣志在縣東北二十五里相傳

伍子胥墮環於此

大蕩漾 長興縣志在縣東南四十里

陸滙 萬歷湖州府志在縣東五里陸龜蒙築別業

於此

陸龜蒙自遺詩五年不到舊山村樹有交柯
續有孫最愛升山顏色好晚雲纔散便當門

太子滙 萬歷湖州府志在縣東六十里相傳吳太

伯所隱處

紫花澗 太平寰宇記在縣西北三十里兩岬芳蕪

之中出紫花長薄之下生珠藤至三月紫花滿澗

一名花瀨

陸龜蒙自遣詩花瀨濛濛紫氣昏水邊山曲更深村終須檢取幽棲處老樹成

雙便作門

伏翼澗

萬歷湖州府志在縣西三十九里山墟名

云澗中多產伏翼有素翼赤腹千載倒掛者

餘漁浦

弘治湖州府志在縣東北四十二里周處

風俗記云諸漁浦一名餘吾浦即陽羨之東鄉也

吳越之間漁吾同音故然

蔡浦

萬歷湖州府志在縣東北四十五里達烏程

小梅

金灣

弘治湖州府志在縣西北四十里山墟名云

金潭金山金塘金渠悉漢樓船將軍金曼倩所居

白馬潭

崇禎長興縣志在縣西四十三里梁陳故

事云陳武帝時有白馬出見故名

五花潭

長興縣志在縣西北四十五里虎頭巖下

大旱不涸

竹山潭

弘治湖州府志在縣西北一十二里深不

可測有巨魚藏於巖竇之下浮如覆舟出必有大水

烏龍潭 萬歷湖州府志在方山頂上與弁山黃龍洞相拒歲旱禱雨輒應

無胥淹 弘治湖州府志在縣嘉會鄉無胥村東相傳伍子胥奔吳追者在後遇一婦浣紗問曰見子胥乎婦曰無胥以此得名淹內有堆名郭轉堆

花渚 弘治湖州府志在梅溪鎮吳越征西將軍吳

瓌所居

顧渚

弘治湖州府志在縣西北三十里前見其源出

顧渚山至水口而東入太湖

杜牧遊顧渚詩傍溪侵嶺多高樹誇酒詩

旗有小樓驚起鴛鴦無限意一雙飛去却回頭

小白瀨

弘治湖州府志在縣東南三里一名曰靈

湍

金沙泉

輟耕錄湖州長興州金沙泉唐時用此水

造紫筍茶進貢泉不常出有司具牲牢祭之始得

水事訖卽涸宋季屢加浚治泉迄不出至元十五年
中書省遣官致祭一夕水溢可溉田千畝遂賜
名瑞應泉

玉竇泉 弘治湖州府志在長興縣西南六十五里
深廣皆二尺色紺碧味甘唐處士鄭遨與道士李
道殷羅隱築屋泉口號三隱

德清縣

吳羗山 弘治湖州府志在縣東南一里吳均云漢

高士吳羗避王莽之亂居此山後人名焉又宋沈
麟士居於此講經教授從學者數百人時爲之語
曰吳羗山中有賢士開門教授居城市後建祠於
山陽

吳憾山 吳興掌故在縣西南一里相傳吳夫差伐
越築壘於此唐李光弼偏將辛孜亦築城於此以
平朱覃姚廷等賊吳越王又築此屯戍號奉國城
今陽溪名城南界首名奉國

市亭山 名勝志在縣南一里其下出陶器大者可容三十石其名曰礪吳興掌故云一名舍亭山南史齊王敬弘隱居吳興之舍亭山其孫秀之出守吳興到郡修葺舊山移置輜重即此

望洛山 吳興掌故在縣南二十里入東記云永嘉中洛人過江者升此山以望洛故名

丁山 萬歷湖州府志在縣南三里一山獨隆起

東主山 萬歷湖州府志在縣東北三里一名百僚

山侯景圍臺城將軍沈恪以拒戰功封東興侯即

家焉山腰有小石穴貯水清冽冬夏不竭名老鴉

潭山之東有五子石相傳有仙人常弄石於此

張羽

登德清百寮山詩湖鄉風景三秋後佛界軒窗四望開碧水翻從城裏過青山直到縣前來魚商酒市晴偏集釣艇蓮舟晚共回自古登高能作賦坐中誰是昔賢才

茅山 吳興掌故在縣東北十五里

葛山 舊浙江通志在縣東北十八里

敢三山 嘉靖湖州府志在縣東北二十里山有三

峰其中峰曰敢山其左曰龍山其右曰鳳山其下有敢山漾

上蘭山下蘭山 萬歷湖州府志在縣北五里許
二山相連山之陽夷坦唐天寶間常置臨溪縣

小山 舊浙江通志在縣西十八里界武康

金鷺山 吳興掌故在縣西五里漢述善侯沈戎葬
其下有金鷺飛集三鳴而去因名今山之陽三村
名上初鳴中初鳴下初鳴以表鷺異也

方山 萬歷湖州府志在縣西北十二里山形方正
爲邑諸山之宗逆而上則爲大壯嶺以南諸山順
而下則爲官莊塢以北諸山羣峰環合百寮山居
其中爲縣治又分而下則爲上下蘭諸山云

金紫山 萬歷湖州府志在縣北十八里郡城丁氏
葬此山後贈金紫光祿因名

蠡山 弘治湖州府志在縣東北一十五里舊傳范
蠡之故居在焉

齊眉山 吳興掌故在縣東北三十五里入東記云

後漢青州刺史姚恢與海昏侯沈戎卜居柯田山
恢女是我子婦密報戎戎先居之恢因囚女於此

山山東有漾亦名囚女漾今人改山名爲齊眉山

德清山 一名鳥山 萬歷湖州府志在縣東四里昔烏巾

善釀居此天寶六年以縣名改山爲德清有兩峰

前曰殿子峰後曰省山峰

果山 名勝志在新市鎮之南宋淳祐間宰相游侶

嘗愛其山水及謝事遂占籍居焉侶蜀人也以蜀有果山因壘石作山以擬之山前有桃源洞

赤土山 弘治湖州府志在縣南二百步父老相傳云昔有望氣者謂此山有貴人氣遂鑿斷後圃今馬厄河是也

餘不溪 萬歷湖州府志在縣東

詳附郭山川

李宗諤圖

經云水清澈餘則不故名

倪瓚餘不溪詞餘不溪水涵綠蘋微風吹波感

龍鱗看山蕩漿不知遠兩岼桃花飛接人溪迴路轉松風急竹林華房霞氣濕忽逢道士頽而長疑

是韓國張子房相期飄拂紫烟裏下攬滄溟浮玉
觴錢鎮餘不前溪詩苔水從南來真源自天目始
出纔涓涓蛙跳雀可浴東風桃花水一夜高於屋
百里下吳興一汎更一曲青山浮水面處處居可
築草元伊誰亭名花間疎竹
自昔稱餘不佳名豈虛辱

龜溪 名勝志龜溪一名孔愉潭即餘不溪之中流也

學圃憲蘓孔愉少時嘗經行吳興餘不亭見人籠
龜於路買而放之餘不溪中龜中流左顧者數過
及封此亭侯鑄印而印龜左顧三鑄如初印師以
聞愉悟取而佩焉愉卒後龜啣巢木置於此至今

號龜啣樹溪名龜溪

雷青曰札孔愉放龜左顧遂作一鼎其文曰孔敬康鼎沉

之於水卽今
德清縣龜溪

大海漾 嘉靖湖州府志在縣東十五里

苧溪漾 弘治湖州府志在縣東二十五里濶數百

頃山墟名云以貢苧得名南岬有蘭相如廟北岬

有青州刺史姚恢囚女城

西葑漾 萬歷湖州府志在縣東三十五里其水清

澈蠶時村民多取以繅絲蓮蒲雜生葦柳相映亦

江鄉一勝處也

蔣灣

弘治湖州府志在縣東南三里大溪之傍

荷葉浦

弘治湖州府志在縣東北二十五里

葛天民荷

葉浦中詩急雨捎荷分外奇珠璣狼藉錦紛披下塘六月關心處西塞扁舟入手時却傍青蘆深處宿還思白石去年詩平生浩蕩烟波趣月淡風微只自知徐贇過荷葉浦詩粼粼水溶春淡淡烟銷午不見唱歌人空來荷葉浦無處寄相思停舟采芳杜

蜃潭

嘉靖湖州府志在縣東布政分司之前溪流

至是滙而爲淵相傳蜃所潛也

仙潭 弘治湖州府志在縣東南新市鎮隋道士陸修靜常自此潭沒數月乃出故名宋葛書思常監鎮有仙潭雜咏刻石在墨妙亭

半月泉 名勝志在縣東北三里石壁山下晉咸和間梵僧名曇者過其地指山石曰是有泉乃卓

菴其處鑿石罅如半月果得泉清涼甘美名曰靈

泉後名半月泉

呂祖謙修半月泉疏斷崖吐月纔出半規古梵涵星尚懷全壁久矣

寶奩之廢時哉玉斧之修護此寒清祓其氛翳名高詩社再傳和仲之符價重帝城復植文饒之運

蘇軾遊半月泉詩請得一日暇來遊
半月泉何人施大手劈破水中天

瀑布泉 嘉靖湖州府志在縣東越山僧院

武康縣

雲岫山 萬歷湖州府志在縣東十里有烟霞洞林
麓之勝號稱洞天

獅子山 武康縣志在縣東北五里

互見歸安縣

封山 吳興掌故在縣東十八里防風氏所封之地
又名風渚山吳康侯封山記唐天寶六年更名防

風山

禺山 嘉靖湖州府志在縣東南三十里防風氏所

都也一云夏帝禹常南巡狩至此

太平寰宇記仲尼曰汪芒氏之

君守封禺之山言防風治此二山也

計籌山 吳興掌故在縣東南三十五里越大夫計

然於此籌國計其中有巖幽窅而夷曠曰白石洞

天戴表元昇元觀記計籌山當餘英之東南越大夫計然常登此山籌度面勢以營隱居久之道

成仙弘治湖州府志其地與臨安縣分界俗謂之去

界頭山蓋計界籌頭聲相類也

黃石翁計籌山中寄句曲山人詩松

花落粉啼子規山人燕坐春晝遲石泉豈非大韶樂日色猶是鴻荒時筠籃竹杖烟中語青紙丹書

林下詩應謝錢唐舊知識白雲獨往無還期

銅官山

嘉靖浙江通志在縣西北二十五里唐名

武康山昔吳王濞採銅於此山下有二坎號銅井餘

英溪之水出焉旁有石燕洞其燕亦視春秋分爲

隱見與巢燕相同

鳳味山

弘治湖州府志在縣北五里按餘英志云

其山有三一在縣北首枕郭林溪爲鳳味一在縣東北懷德里爲鳳翅一在縣東南千佛寺側爲鳳尾

金山 嘉靖湖州府志在縣南三十里舊傳有人掘地得金故名其土色赤其上有泉產金魚

石城山 名勝志在縣西南三里赤眉之亂邑人壘石禦守因以名山

覆舟山 萬歷湖州府志在縣西南二十五里有巨

石橫亘如覆舟狀山有馬頭塢晉咸和七年石勒將韓雍寇吳興詔遣西中郎將趙引攻之於馬頭塢即此

箬峴山 武康縣志在縣西南二十七里俗呼箬嶺
銀山 萬歷湖州府志在縣西五里又名永安山吳
名縣爲永安以此

白鵲山 吳興掌故在縣西北十里高六十五丈一
名鵲山

招賢山 萬歷湖州府志在縣西北七里郭文隱居之地

響應山 名勝志在縣西八里其上有大響巖小響巖人經此山者隨語應聲山下有龍湫曰碧玉潭唐于頔宋葛勝仲皆有題刻有定光院在巖腹中小池上有濯纓亭又有一壑軒後沿石磴抵谷中有斷崖瀑布二十餘丈

場山 弘治湖州府志在縣西二十七里山墟名云

昔有嵒氏居此山

石嶠山 吳興掌故在縣西南七里山頂有石嶠長丈餘下有石嶠村

獨孤山 吳興掌故在縣西北七里世傳唐獨孤及宰是邑作亭其上故名

計峴山 武康縣志在縣西北二十五里計然嘗居此故名

大泉山 太平寰宇記在縣西北三十五里山上有

長流泉傍多沃壤可耕又名唐鎚山

莫干山 嘉靖湖州府志在縣西北二十七里舊傳

吳王鑄劍之地

詳見烏程縣

石山 萬曆湖州府志在縣北二十里舊有沈道虔

石山精舍

銅峴山 武康縣志在縣西北五十里餘英溪發源

於此

詳見安吉州

沈璧山 吳興掌故在縣東北十五里山有九峰逶

迤相接沈氏自東陽徙居於此

仙臺山 萬歷湖州府志在縣東北十八里即黃隴
山黃初平煉丹之所有羊沒塢初平嘗牧羊羊傷
其草木乃叱之羊遂化爲石

謹按列仙傳初平叱石成羊事在金華羊沒塢
云云恐非實也但紀載相沿錄之存疑可耳

獨蒼山 萬歷湖州府志在縣東三十里舊傳爲縣
主山來自鄣南天目之脉山下今亦成鎮昔郡設
永寧倉歲有水患有異人指此山土取築之可免

果如其言

西吳里語山與烏程卞山俱爲吳興主山故稱蒼卞

烟霞塢

名勝志在縣東七里唐劉穎士秀叔別業

中有龜巖巖前瀑泉聲激如雷谷口梅花綿亘數

里有橋亭名曰掛雲

風渚湖

萬歷湖州府志在縣東南一十七里一名

巽渚一名封渚一名九里湖一名下渚湖餘英志

云防風氏在封禺兩山之間故名

毛滂下渚湖詩春渚連天濶春

風夾岼香飛花渡水急垂柳向人長遠岫分蒼翠微波映渺茫此身萍梗爾泊處卽爲鄉

前溪 晏公類要在縣南一百步晉車騎將軍沈充

家於此樂府有前溪曲充之所製

詳附郭山川

餘英溪 弘治湖州府志在縣西一十三里即前溪

上流沈約宗族所居之旁也

詳附郭山川

封溪 弘治湖州府志在縣東一百步源出於前溪
瀦爲風渚湖古所謂風渚也

阜溪 嘉靖湖州府志在縣北七里自三橋埠東流
二里會於沙溪

雙溪 武康縣志在縣西北四十五里發源銅峴山
流入餘不溪

阮公溪 晏公類要在縣西一十七里梁陳故事云
石英寶會稽人寓武康生女有殊色天監元年選
爲采女生元帝爲修容賜姓阮氏拜其父爲奉朝
請因以名溪

新溪 萬歷湖州府志在縣東三里宋淳熙三年縣
令蔡霖自汭溪口徙水道東北注五里合長安溪

以通舟楫民號蔡公溪

詳見水利

明月汀 弘治湖州府志在縣庠門外大溪之南

仙人渚 太平寰宇記在縣西四十里昔沈羲得道
之所有石梯見存

碧玉潭 萬歷湖州府志在縣西一十里響應山下

舊名響潭

毛滂碧玉潭詩水面平鋪映碧空夜深
明月照龍宮猿啼未響潭先響一樹花

開兩
樹紅

石井 弘治湖州府志在縣石脇山井在山巖中天

欲雨時井出雲氣

銅井 弘治湖州府志在縣銅官山之麓昔人引藤蔓爲綆探之莫窮其底旁有石燕洞

錢王飲馬井 萬歷湖州府志在縣北一十五里相傳吳越王微時飲馬坎中水泉迸出故名

安吉州

天目山 嘉靖安吉州志在州西南一百五里

詳見臨安

潛於

霧山

吳興掌故在州南十五里山多雲霧故名

冠準

過霧山詩青燈樓殿枕寒溪門外天垂斗柄低啼鳥不知春向背落花依舊水東西半橋霜月光相照一帶松烟色未齊誰料百年榛莽地香雲今日繞輪蹄

石虎山

嘉靖湖州府志在州南十五里其上有石

狀如虎道孝豐者徑焉

梅溪山

續齊諧記吳興故鄣縣東三十里有梅溪

山山根直豎一石高百餘丈青而圓如兩間屋大

四面陡絕仰之千雲其上復有盤石圓如車蓋恒

轉如磨聲若風雨土人號爲石磨轉快則年豐轉遲則歲歉驗之無失

石門山 吳興掌故在州西四十里梅溪之西梁吳

均居此

吳均與顧章書梅溪之西有石門山森壁爭霞孤峰限日幽岫含雲深溪蓄翠蟬鳴

鶴唳水響猿啼英英相雜綿綿成韻既素重幽居遂葺宇其上幸富菊花偏饒竹實山谷所資於斯已辦仁智所樂豈徒然哉嘉靖安吉州志石門山生石耳

銅峴山 嘉靖安吉州志去州東三十里漢書云吳

王濞即豫章銅山招致亡命以鑄錢括地志云吳

採鄣山之銅卽此地也

天井山 萬歷湖州府志在州南五十里山半有潭
深峻泉水傾瀉四時不竭

鳳凰山 名勝志在州東三十里中有隱塢云陶弘
景居之

仙人洞山 萬歷湖州府志在州南四十里洞深三
十二丈

青山 吳興掌故在州南三十五里
吳均與施從事書故鄣縣東三

十五里有青山絕壁干天孤峰入漢歸飛之鳥千翼競來企水之猿百臂相接秋露爲霜春蘿被徑信足蕩累頤物娛衷散賞吳均青山詩家住青山下時向青山上青山不可上一上一惆悵

廩山 嘉靖湖州府志在州西北二十五里一名郎

閣山舊傳長沙桓王攻劉繇盡得郎閣糧穀即此

落石山 弘治湖州府志在州西三里唐李衛公廟

中有隕石土人皆稱石大王故爲此名

玉磬山 吳興掌故在州東北十五里又名崑山吳

興地記云安吉有崑山攷之梁僧曇諦卓錫於安

吉東北十五里得一璞扣之有磬聲因名玉磬山
又以玉出崑名崑山

東晉山 萬歷湖州府志在州東北二里東晉欲立
城郭於此因名即今青峴山

郭公山 吳興掌故在州西北一十里晉郭文居此
山偶見一虎張口向文若求救者文視其喉中有
橫骨探去之後虎啣鹿以報云

九龍山 名勝志在州西北三十里山有九隴其狀

如龍上有石城一名石榔山

浮雲山 安吉州志在州東北四十里嘉靖浙江通志上有七十二鰲鰲如雲久旱出雲則雨

純孝嶺 吳興掌故在州東北三十里黃巢之亂民石昂負母避此

五湖 弘治湖州府志在州東南七里曰五龍湖在西南三里曰姚湖在南九里曰獲湖在北二里曰西畝湖在東二里曰四龍湖四龍者吳越武肅王

以望氣者言山有王氣使人鑿之忽有四鵲飛起
烟雲滃然化爲四龍因名

揚子湖 萬歷湖州府志在州北二十里吳興記曰
揚子湖出丹陽湖下會卽閣水分流合於苕溪

玉帶橋 西吳里語在安吉銅山鄉許夫人墓前早
晚兩潮高尺許

魏塘 弘治湖州府志在州北五十里旁有浮玉山
所謂黑石玲瓏清泉浸之者也五代時吳瑱將軍

隱於此

梅溪 嘉靖安吉州志在州北三十里溪上嘗有紫
梅盛開故名一名紫梅溪凌孟傳所謂紫梅溪下
水平橋即此

蒙泉 安吉州志在上方寺其味甘或垢之即竭必
淘濯始復流

孝豐縣

天目山 萬歷湖州府志在縣西南六十五里與杭

府接界高三萬六千丈周回八百里

詳見臨安於潛天目

山志天目有三峰東峰從臨安入西峰從孝豐入

有十二龍潭六屬孝豐六屬於潛

吳興掌故天目東峰從臨安入

疎豁可行西峰從孝豐入深僻不易

八貢山 吳興掌故在縣南二十五里磅礴鎮靜爲

四山具瞻山有尖峰縣治學宮皆面之

虎山 吳興掌故在縣北三十里安吉州境險峻不

可越成化間縣丞許芳鑿山通道以便往來

浮玉山 名勝志在縣東南十五里山海經云勾餘

山三百里曰浮玉苔水出於其陰注於具區都穆
遊道場山記吳興有兩浮玉其一在孝豐東南十
五里名大浮玉郡城南碧浪湖者小浮玉也

佛子山 弘治湖州府志在縣西南七十五里太平
鄉亦名佛嶺吳興記云山有石室中有小石莊嚴
不倚儼然如佛故名

古浮山 弘治湖州府志在縣東南一十五里浮玉

鄉與浮玉山相接山有古浮石洞普慈寺宋郡守
葛勝仲詩略云路出古浮山木杪飛華屋即此處
也

師高山 萬歷湖州府志在縣北五十里勢接天目
山中積雪炎月不消

金石山 名勝志在縣西南三十里高一萬八千丈
周三百里其石色黃土色赤又十里爲巖龍洞巖
高百丈中有洞莫測其深上有飛瀑懸巖而下

鳳凰山 吳興掌故在縣東五里

東山 吳興掌故在鳳凰山之北峭拔南來峙縣之
左上有竹塢泉四時不竭

廣苔山 萬歷湖州府志在縣南三十里天目之陰
苔水所發源

大溪山 吳興掌故在縣南三十五里高八百五十
丈周四十五里

南嶼山 嘉靖浙江通志一名泉石山又名白水山

高三百六十丈上有湖有蘭畹

五山 嘉靖湖州府志在縣東北五里一名奕山舊傳姚紵於此樵採見二人對奕因以名山

董嶺水 嘉靖安吉州志在太平鄉去縣西七十里

嶺上有源分東西東流者入寧國西流者由松坑

西嶼入下洛溪

周朴董嶺水詩湖州安吉縣門與白雲齊禹力不到處河聲流向西

去衙山色遠近水月光低
中有高人在沙中曳杖藜

橫溪 石柱記箋釋在縣東北當即苔水太平震宇

記所謂苔水在安吉縣治西南七十五里者此也

謹按孝豐設於明成化二十三年割安吉縣之九鄉長興縣之三鄉隸之故震宇記繫之安吉縣

景溪 萬歷湖州府志在縣西南二十五里廣苔鄉

上接深溪

下洛溪 陳安溪 五山溪 萬歷湖州府志俱縣

東北

仙溪 弘治湖州府志在縣西南七十里太平鄉銅


坑其源發自佛子山水甚清淺不生魚蝦因以仙

名至西嶼溪始通舟筏直抵下洛溪合於苔溪

荻浦 孝豐縣志在縣西南三十里其源出自天目

蛟龍池 弘治湖州府志在孝豐縣天目山東南有

瀑布下注數里



浙江通志卷十二

欽定四庫全書

史部

浙江通志卷十三

詳校官給事中臣戴璐

檢討臣德生覆勘

總校官編修臣倉聖脉

校對官中書臣朱炘

謄錄監生臣李學瞻

欽定四庫全書

浙江通志卷十三

山川

五

寧波府

鄞縣
附鄞

府山

咸化四明郡志在府堂後假鄮山為名父老

相傳宋郡守胡槩取五方土積成此山以鎮郡城

鎮明嶺

咸化四明郡志在郡治南一里三十步高

五丈乃郡之案山也宋天禧中李夷庚為守精地

理之學以土增高數丈後稍平焉

袁士元鎮明嶺詩一嶺陂陀鎮

四明無風無水自天成閒看來
注登瀛客彷彿金鰲背上行

鰲河

舊浙江通志在府治西北百步四周學宮

鰲池

舊浙江通志在學宮西

昌黎泉

鄞縣志在縣治南二里南倉基內紹興間

郡守韓仲通建亭其上故名

鄞縣

城外山川

四明山

丹山洞天圖咏集在東海上山有四穴通

光啓天宇澄霽望之一如戶牖土人名之曰石牕
故山以名木玄虛云天下洞天三十有六四明第
九其號曰丹山赤水是也按山周三百八十里常
有雲氣覆冒於中凡二十里不絕名曰過雲南曰
雲南北曰雲北山隴行三十里有峰曰雲根石屋
有瀑布如懸河旁曰潺湲洞後漢劉綱為上虞令
棄官同妻樊雲翹居洞側得仙術上昇後人立祠
奉祀有榭曰樊榭梁隱者孔祐仍居之有鹿中箭

來投祐祐為牧豢愈而去故祠側建鹿亭山之木
曰青櫺其實味甘而不可猝破山之獸曰鞠侯唐
咸通中謝遺塵隱此陸龜蒙皮日休往還各賦詩
九首舊浙江通志縣西南百五十里由天台山發
脉向東北一百三十里湧為二百八十峰中有三
十六峰周回八百餘里綿亘鄞奉化慈谿及紹興
之餘姚上虞嵎台之寧海諸境上有方石四面如
窻中通日月星宿之光故曰四明山山為餘姚所

轄東七十峰狀如驚浪郭璞言後五百年當立州
治至開元置明州適符其言山西連脊起峰狀如
奔牛曰奔牛山中有三朶峰鼎足以立漢張平子
居焉其支山為杖錫為石樓為松巖為雷峰為大
雷為雞籠為烽火樓為峒山為鼈山為西山

孟郊
送蕭

鍊師歸四明山詩開於獨鶴心大於高松年迥出
萬物表高棲四明巔千尋直裂峰百尺倒瀉泉絳
雪為我飯白雲為我田靜言不語俗靈蹤時步天
劉長卿游四憲詩四明山絕奇自古說登陸蒼崖
倚天立覆石如覆屋玲瓏開戶牖落著落明四目箕
星分南野有斗挂簷北日月居東西朝昏互出沒

我來游其間寄傲巾半幅白雲本無心悠然伴幽
獨對此脫塵鞅頓忘榮與辱長嘯天地寬仙風吹
佩玉陸龜蒙四明山九題詩石窻石窻何處見萬
仞倚晴虛積竄迷青瑣殘霞動綺疏山應列圓
嶠宮便接方諸只有三峰客時來校隱書過雲相
訪一程雲雲深路僅分嘯臺隨日辨樵斧帶風聞
曉看衣全濕寒銜酒不釀幾回歸思靜彷彿見蘇
君雲南雲南更有溪丹磔盡無泥藥有巴賁賣枝
多越鳥啼夜清先月午秋近少嵐迷若得山頭住
芝菌手自攜雲北雲北近陽川人家洞壑連壇當
星斗下樓接翠微邊一半遙峰雨三條古井烟金
庭如有路應到左神天鹿亭鹿亭巖下置時引白
麕過草細眠應久泉香飲自多認聲來月塢尋路
到烟蘿早晚吞金液騎將上絳河共問古榭何時
築人應白日飛至今山客說時駕玉麟歸乳帶懸
松嫩芝臺出石微憑闌虛目斷不見羽華衣潺湲

洞飛瀑瀉雲根漚漚萬古音似吹簫羽管如奏落
霞琴倒穴漂能沫穿松澗鶴襟何人采月弄應作
上清吟青橘千山寶號青檣環岡次第生外形堅
綠殼中味敵瓊英墮石樵兒拾敲林宿鳥驚亦應
仙吏守時取薦層城鞠侯何事鞠侯名先封在四
明但為連臂飲不作斷腸聲野蔓垂纓細寒泉碾
玉清滿林游宦子誰與作公卿孫元寶游丹山詩
四明洞天居第九巨靈劈石開窗牖桐蘿防嶽不
憚勞同行況遇忘年友老苔護石蒼虎聞飛瀑慙
巖玉龍吼豁然人與境俱勝醉歌拍缶忘升斗固
知壺中別有天未必醉翁真在酒徘徊步月憶忘
歸世事浮雲竟何有馬適賢游丹山詩城居久憶
洞天名春日登臨杖履輕山雨晴時崖瀑冷巖花
落盡石窗明黃冠白髮情偏古野水閒雲意自清
便欲去尋剡縣令願攜妻子學長生戴表元四明
山中喜晴詩一岡一澗一潏洳新歲新晴始此迴

莎坂南風寅蛤出茅簷西日乙禽來人迷白石羊
羣路水卷青天雪裏雷猶是深山有寒食梨花無
數繞
巖開

龍山 嘉靖寧波府志在縣東三十里與定海陳山
界狀如遊龍故名四明山發脉迤邐自南而東北
至此

鹿山 鄞縣志距城三十里名勝志相傳昔有鮑郎
射鹿於此及視之乃石也因名

陽堂山 延祐四明志俗曰青山縣東四十九里四

面懸絕下有鮑郎廟

鄮山 延祐四明志在縣東三十里按十道四蕃志
云海人持貨貿易於此故名鄮縣在鄮山之陰乃
加邑為鄮

同谷山 成化四明郡志在縣東四十五里嶄峩崔
嵬融結靈秀玉几左肱太白右股大涵靈峰居其
前後

阿育王山 阿育王山志山去府治四十里其源始

於天台以太白山為近祖有涌現巖乃塔涌之所
西晉太康間有劉薩訶者神人指示云會稽有阿
育王寶塔汝往頂禮於是薩訶精誠敬禮至於鄮
山忽一夜寶塔從地涌出舍利騰輝阿育王造八

萬四千塔此其一也

劉仁本游育王山詩古鄮名
山控海涯諸天深護梵王家

一峰橫玉前陳几七井沉金下涌沙鐘磬隔林回
鶴鶴松杉夾道走龍蛇明朝更上磐陀石遙睇祥
光燭海霞裾布峪游育王山詩育王名剎古流
傳燈火於今幾百年舍利有光垂半榻雨花無數
散諸天鐵輪高揭晴軒外玉几端臨寶閣
前最憶能吟澹游叟東湖先渡月波船

大涵山 成化四明郡志在縣東三十五里瀕水而秀天霽風晴則水光山色上下相映

西亭山 嘉靖寧波府志在縣東三十里層巒聳秀下瞰深淵人擬赤壁之勝竝山而居者多高錢二姓又名高錢山

青山 嘉靖寧波府志在西亭山南三里許峰巒疊翠春時懸紅粉白如圖畫

白石山 鄞縣志距城四十里名勝志玲瓏峭拔上

有神仙石棋枰一名火石海舶見者以為光怪

筭箕山 鄞縣志距城五十里名勝志山即小白嶺

元朝請大夫盧元因眈太白之勝結廬居焉

跣跨山 成化四明郡志在縣東五十五里瀑布懸

崖山有鬼谷先生祠

太白山 延祐四明志在縣東六十里視諸山為最

高巔有龍池旱暵必禱焉或曰山以太白星得名

又曰近有小白嶺故此為大白非太白也

詩賈太白山詩

千峰下視盡兒孫仙事寥寥不可聞
長作人間三月雨請看膚寸巔頭雲

玉几山 延祐四明志在阿育王山前自寺視之橫

陳如几

袁稱望玉几山詩玉几峰橫寶塔前彌天消息是真傳蒲團禪板都忘却似笑當年

手指天

天童山 天童寺志在縣東六十五里晉永康中僧

義興結廬感太白星為童子給侍故名有佛跡石

玲瓏巖龍隱潭諸勝

王安石游天童山溪上詩溪水清連老樹蒼行穿溪樹踏

春陽溪深樹密無尋處唯有幽花度水香范成大自育王過天童松林三十里詩竹輿窮窕入蕭森

逗雨梳風冷客襟翠錦屠蘇三十里不知脚底白
雲深葉蒨天童山詩著足萬松關東州第一山曉
泉窮地脉厓棧近天顏奎畫疎烟外鐘聲遠樹間
衲翁曾有約分我片時間居隆玲瓏巖詩巖前老
樹挂枯藤辟穀仙人苦行僧四壁
秋蛩霜外杵一床黃葉雨中燈

杖錫山 成化四明郡志在縣西南一百二十里前

有七峰上有四明山心四漢隸字唐僧紀飛錫至

此故名

陳蕃同黃東發提舉游杖錫山詩十八盤頭翠碧函參差簷棟倚巖蘄桑根已換如

木座峰頂猶存太白巖地有栗泥堪當飯山無松木獨宜杉半天圖畫風塵外我有新題居士銜

梨花山 月波山 百步尖山 延祐四明志皆在

東錢湖

亶洲山

太平寰宇記在縣東北近海岸

動石山

太平寰宇記山有堅石高五六丈下有小

石支之暴風雨則其石自動行於山者聞隆隆作聲

靈山

太平寰宇記郡國志云山有石鼓臨澗若鳴

則野雉翔鳴故曰靈山

五臺山

輿地紀勝在鄞縣上有開元寺內有六子

院

佛隴山

嘉靖寧波府志在天童山西南二里

隱學山

延祐四明志在東錢湖其下有栖真寺放

生池徐偃王隱學於此

陶公山

名勝志在縣東南四十五里東錢湖中世

傳陶朱公常隱於此有釣魚磯在焉

洪性登陶公山詩霸越平

吳此息機蓑衣終日坐魚磯一竿風月高名在千古江山舊事非春雨荒臺蒼蘚合夕陽古渡釣船歸探奇欲試登臨興

流水無情白鷺飛

它山 舊浙江通志在縣南五十里

四明它山水利備覽大溪之南

流皆下其北則皆平地至是始有小山虎踞岸旁以其無山相接故謂它山

大梅山 霏雪錄在縣東南七十里梅子真隱處石

洞仙井丹竈藥爐猶存鄞縣志山有獨秀峰其支

隴延結為象峰下有保慶寺

朱祐秋日游大梅山詩秋日簾輿度翠微

大梅山色碧成圖仙人汲井留丹汞禪老綯荷製衲衣龍護法幢天女現經歸寶藏雨花飛此行直欲探幽蹟更入前峰叩石扉劉鼎大梅山詩大梅山下神仙窟與客來遊得遍觀尚有松花留宿供已無藥竈覓靈丹峰巒環遶三摩地澗水盤迴百折湍竹杖芒鞋應不倦題詩日日記清歡

五峰山

嘉靖寧波府志在縣東南四十五里

金峨山

輿地紀勝在縣南八十里州之控山也鄞

縣志其山自道陳嶺分界東屬於鄞西屬奉化

朱祐

金峨山詩金峨山勢自天來雨後岡巒綠似苔隱
隱鼓鐘空谷裏重重臺殿白雲隈青鞵布襪真吾
志野草靈苗盡藥材聞說溪
山更深處老僧竹屋傍巖開

厲山

延祐四明志在縣南三十五里

姜山

延祐四明志在縣南八十里平原崛起有石

洞三其一最大曰後巖中可坐數十人洞後又有

一小洞上有小穴形圓如月可仰窺天里人祠神像於巖中

茆山 延祐四明志在縣南五十里與姜山對峙名

勝志上有一井以竿測之其深無底

張樞茅山詩今古茅山是

勝游秀峰突兀繞滄洲雲含老樹迷還散石擁甘泉咽復流未見巖風晨下鶴祇聞澗月夜鳴蜩道人不是悲秋客黃菊丹楓相對愁

塔嶺山 嘉靖寧波府志在縣南四十里蒼翠峭立

四面環列二十三峰

錫山 延祐四明志在縣西南五十里常產錫故名

建舉山 鄞縣志距城五十里名勝志峰巒十五巖

立於前狀如列戟鬱然深秀下有寶嚴寺

清秀山 鄞縣志距城六十五里上有三十六峰清

奇秀麗故名

銀山 延祐四明志在縣西南五十里常產銀故名

天井山 四明龍箬在縣西南七十里有五井一巖
突然而出者下嵌百仞之淵地僅容側足緣蘿可

行至下井之旁石皆光潔又行三里為中井又三里則上井愈入愈險餘二井益險絕人跡罕到旱

暎祈禱得金線蜥蜴或蛇鱗之類自下山望之奕

奕有光雨輒應

張瓚天井山詩緣蘿躡磴共躋攀
水色山光遠近間五井龍蟠通海

窟半空猿嘯隔塵寰石壇雲冷人稀到溪路苔
深馬倦還駐節相看秋社散夕陽簫鼓度前山

灌頂山 延祐四明志在縣西南七十里其山直上

二十里方至頂有普淨禪院歲納學租宋有採鐵

於此者朝旨禁之

唐舉山 寧波府志在縣西南五十里

雪頭山 嘉靖寧波府志在縣西南八十里上有龍

湫名胡家聖井

蜜巖山 鄞縣志距城六十里巖上常產仙密下承

深淵人不得取

陸舉山 寧波府志在縣西五十里

翠巖山 嘉靖寧波府志在縣西五十里有秦王石

版弓箭洞葛仙翁以泥封之遺跡猶存

武陵山 鄞縣志距城四十里嘉靖寧波府志舊傳
劉阮采藥於此至今桃花萬樹春月盛開如錦綺
聖公山 鄞縣志距城四十里壁立千仞石室虛明
相傳朱彥誠常遇仙於此

白鶴山 嘉靖寧波府志在縣西四十里

前畧山 嘉靖寧波府志在縣西四十六里羣峰起
伏靈秀盤結

楊畧山 成化四明郡志在縣西三十五里峰巒環

拱竹木森然

蔡家山 嘉靖寧波府志在縣西三十五里

望春山 嘉靖寧波府志在縣西三十里與白鶴山

對峙為邑西小朶

魯壘山 成化四明郡志在縣西三十里

岐山 嘉靖寧波府志在縣西三十里相傳常有異

鳥集此又名旗山以張循王陳兵於此

大慈山 延祐四明志在東錢湖下水壘宋丞相史

魯公葬母於此

戴良游大慈山詩水行境謂盡陸出路旋通乃即蒼松徑步入青蓮

宮連嶂既昔萃密林亦蔥蘢地涉清淨界身游紫翠重臨流玩廣治企石眺奇峯寒鏡湛秋夕碧玉劃晴空蘭若與巖峻象筵綠教崇謁祠嘒卿相尋僧叩禪宗契理已無像觀念豈有窮願絕區中緣永依塵外踪嗒然遺身世年齊天地終

躊躕嶺

嘉靖寧波府志在縣南一百十里名勝志

山路險峻過者躊躕故名

王昶躊躕嶺詩秋日澹平無登扳興不孤祇疑

盤谷道還是輞川圖嵐氣諸峯合溪容衆壑殊何人乘秋段四顧為躊躕陳著躊躕嶺詩石路崔巍雲上頭北雲南雪此鴻溝誰人題作躊躕嶺不到山心不當游

石城嶺

寧波府志在縣東四十里即同谷山石城

落

大嵩嶺

嘉靖寧波府志在縣東七十里

慈雲嶺

鄞縣志距縣東南六十里在大慈山之南

接東淘嶺

菩提嶺

嘉靖寧波府志在縣東南七十里通奉化

黃官嶺

寧波府志在縣南六十五里

稠嶺

嘉靖寧波府志在縣西四十五里嶺為鄞慈

兩縣之界嘉靖間海道副使李文進命於此設寨

大皎嶺 鄞縣志在縣西七十里

響巖 嘉靖寧波府志在縣西南五十五里壁立下
浸江 waters 折作聲則巖中答之故名唐賀知章常
隱於此

北巖 延祐四明志在縣南五十里巖中可容百人
暑月清涼

丹霞嶼 王穉登客越志在東湖中有補陀洞天史

丞相浩大母葉目盲欲浮海叅大士史虞涉險鑿
此洞待葉來游給云普陀因名

南滄輿 嘉靖寧波府志在縣東五十里太白山之
南

綠野輿 鄞縣志在縣東四十五里

水簾洞 嘉靖寧波府志在縣東五十五里太白山
之南

江北墩 嘉靖寧波府志在縣北三里桃花渡北其

地天成高阜九十九獨一墩半入於江蓋望氣者
故破壞之

鄞江 寧波府志在縣東北二里即甬江也南接奉
化江西接慈谿江三江同會鎮海之大決江東入
於海

蕙江 嘉靖寧波府志在縣南六十里水出大晦山
踰江口會於句章鄉三港口抵它山堰沙明卉茂
庵山原而環之若帶

蘭江 寧波府志在縣南六十里

日湖 四明它山水利便覽在城西南隅唐地理志

載鄞縣下注云南二里有小江湖太和中令王元

暉置小江湖即日湖也

名勝志一名細湖周圍二百五十丈有奇其源與月

湖俱出四明山一自他山堰經仲夏堰入南門為日湖又名南湖一自大雷山經十字港匯望春橋

入西門為月湖又名西湖

月湖 輿地紀勝在州南湖中有汀洲島嶼凡十曰

柳汀雪汀芳草洲芙蓉洲菊花洲月島松島花嶼

竹嶼烟嶼四時之景不同而士女游賞特盛於春
夏飛蓋成陰畫船漾影無虛日也四明它山水利
便覽湖之支渠繚繞城市往往冢映修篁人酌清
泚有旱則引它山之水入月湖以濟一城之用

廣德湖

唐書地理志縣西十二里

詳見水利曾鞏
廣德湖記源出

四明山西七鄉之田水注之者此湖也產有鳬雁
魚鱉菱蒲菰葵葵蓴蓮芡之饒舊名鶯脰湖今名
大歷八年令儲仙舟之所更也貞
元二年刺史任侗又治而大之

東錢湖 至正四明續志在縣東二十五里一名萬

金湖以其為利重也唐天寶三年縣令陸南金開

廣之屢經浚治周圍八十里

詳見水利袁士元和嵎縣梁公輔夏夜泛

東湖詩短棹乘風湖上游湖光一鑑湛於秋小橋夜靜人橫笛古渡月明僧喚舟鴛浦藕花初過雨漁家燈影半臨流酒闌興盡歸來後依舊青山遠客樓

馬湖 嘉靖寧波府志在縣南五十里相傳賀知章

洗馬池

小江湖 嘉靖寧波府志在縣西南三十五里唐令

王君照修

詳見水利

月兒灣 嘉靖寧波府志在縣東三十五里包家橋
形如新月月出泉即吐湧不絕月中即止

文溪 戴表元文溪記明之北四十里有溪曰文溪
郡志以為山水掩映碧而成文名之也

橫溪 嘉靖寧波府志在縣東南四十五里源出乾
坑流至橫溪河

小溪 寧波府志在縣西南五十里地名童家坂今
為沙塞

錫山龍潭

四明龍薈在縣西南五十里宋淳祐有

白龍顯於此又名龍竅屈曲而下莫測其底

綠戲橋潭

四明龍薈在縣東五里舊有龍窟廣袤

十餘丈深不可測至今甚旱不涸

金沙井

四明龍薈在縣東五十里阿育王寺東一

里許兩山夾路陰沉可畏有龍井七舊名瑞井又

名聖井又名鰻井二鰻游泳來去無常邦人禱雨

累驗宋元祐元年賜靈淵廟額

虎跑泉 嘉靖寧波府志在縣東六十五里天童山

西山雙乳泉 寧波府志在縣西三十五里資教寺

北味甘色白

蛟池 嘉靖寧波府志在縣北二里

蜃池 嘉靖寧波府志在縣西北一里

蓮花池 寧波府志在縣西三十五里資教寺內其

花四色又有雙頭白蓮

放生池 嘉靖寧波府志在縣東南五十里隱學寺內

海 嘉靖寧波府志 環府境東際鄞之嵒崎湖
頭蔡家墩東北際定海之招寶山後海塘西北際
慈谿之觀海龍山東南際象山之爵溪東門奉化
之鮑埼裏港海潮自定海入鄞江六十里至府城
東北分為二江西北通慈谿東南通奉化潮汐往
來各有其候

慈谿縣

浮碧山 名勝志縣治負焉北西東三面瀦為湖山

浮其上故名

馮叔吉縣治記浮碧山巔巖中突起其餘高以尋計者可百許兩江襟其

前望中數百里形勝以茲山收之

大蓬山 延祐四明志在縣東北三十里又名達蓬

山上有巖高四五丈巖上有三佛跡秦始皇東游

欲自此入蓬萊故名

周鶚游大蓬山詩靈山名大蓬香水靄蓂蔔龍祇乂覆護

雲物翳深谷拂衣向劫中神斧斫蒼玉至今天上尊靈跡印金粟頗聞開士識飛錫隱巖麓坐令湖海間香供走川陸巍巍虔報地色相嚴金屋緬想舊中竝猶能慰心目藍輿訪蓮社一笑欣自足撫事動幽尋疇能念榮辱松爐裊孤烟餘力付棋局更覺夢中身翛然百無欲

香山 嘉靖寧波府志在縣東北三十里即大蓬山

支隴唐常寂大師建寺於此名智度今名香山寺

范成大香山詩抖擻軒裳一閑歷任教空翠
滴烏巾老身已到籃輿上處處青山是故人

驃騎山 晏公類要在縣南二十里接會稽典錄云

漢世祖時張意為驃騎將軍其子齊方歷中書郎

曾隱於此山因名

城門山 成化四明郡志在縣西南十五里上有宋

城門校尉會稽從事陳詠墓故名

朱墓山 成化四明郡志在縣西六十里宋台州刺史朱夔卜居此山因葬焉故名

闕峰山 成化四明郡志在縣東北一十里吳太子太傅闕澤居其下故名

石柱山 慈谿縣志在縣東北二十里

亶洲山 嘉靖寧波府志在縣東北三十五里

塔山 延祐四明志在縣東南三里陰陽家謂之青龍山

九峰山

慈谿縣志在縣東北六十里

橫山

嘉靖寧波府志在縣南十里

獅子山

寧波府志在縣東南一十里

赭山

嘉靖寧波府志在縣南十里土色赤絕頂有

龍湫

大寶山

延祐四明志在縣西南二里陰陽家謂之

白虎山

雙頂山

嘉靖寧波府志在縣西南七里

釣魚山 成化四明郡志在縣西南二十五里上有
釣臺相傳謝靈運常釣於此

青木山 舊浙江通志在縣西南二十五里

蘆山 成化四明郡志在縣西南二十五里推青擁
翠秀拔鶴洲鳬渚之上東南一峰名烏石尖上有
龍湫名烏石潭

黃墓山 成化四明郡志在縣西南三十五里一名
覆船山山平坦狀如覆船相傳上有漢黃公墓

大隱山 成化四明郡志在縣南三十里晉虞喜常
隱於此三召不起遂名焉元豐九域志夏侯曾先
地志云大隱山口南入天台北峰為四明東足乃
謝康樂煉藥之所洞天福地記大隱山第六十三
福地在明州慈谿縣天寶觀

戍溪山 延祐四明志在縣西南三十五里晉孫恩
盧循入寇劉牢之禦之屯兵於此故以戍名

東澄山 嘉靖寧波府志在縣西南三十五里江水

映帶其左

車廐山 名勝志在縣西南四十里會稽記云越王句踐於此置廐停車秣馬遺跡猶存

句餘山 嘉靖寧波府志在縣西南四十里句章之

西餘姚之東

山海經句餘之山無草木多金玉郭璞曰山在餘姚南句章北

虎胛山

舊志胛作脾誤

延祐四明志在縣西三十里山形

聳踞如虎胛隋大業間常鑿山西南斷跡猶存

鳳凰山 延祐四明志在縣西四十五里丈亭之上

其形如鳳與龍山對峙

桂彦良鳳凰山詩鳳凰山下路縈紆老衲幽棲雪滿

廟三十六池春水活年來還有鳳雛無

三過山 輿地紀勝在縣南山勢孤峻臨江湖水縈
回舟人理棹雖一過猶三過焉

石門山 嘉靖寧波府志在縣西南五十里上有峭
壁如門

白巖山 嘉靖寧波府志在縣西南六十里山麓石
臺三層高五丈其中虛擎如鼎足狀旁石間有膝

印又有五指足跡苔蘚莫能蝕相傳昔有仙人以肩正石臺中添一小石柱以支之因名鄉為石臺

鄉

五馬山 慈谿縣志在縣西南六十里

岡山 嘉靖寧波府志在縣西南六十里平曠深邃地多異茗

石魚山 名勝志在縣西五里又五里為石櫃山俱以形似而名

雲山 慈谿縣志在縣西十五里

仙雞山 成化四明郡志在縣西二十里旁有石雞

抱子山 輿地紀勝在縣東南十里山勢宛轉盤泊

如龍蛇抱子之狀故名

雨微山 延祐四明志在縣西五十里舊名龍山上

有雲氣即雨或云雨徵山

漁溪山 成化四明郡志在縣西五十里石磯枕水

彷彿富春

夜飛山 延祐四明志在縣西四十五里相傳此山
自蜀中夜飛來蜀客識之

太平山 嘉靖寧波府志在縣西六十里下有村與
湖皆名太平

埋馬山 延祐四明志在縣西六十里夏侯曾先地
志云秦始皇游海至此馬斃埋之故名

石塘山 嘉靖寧波府志在縣北四十五里

五峰山 名勝志在縣西北三十五里山有五峰亭

亭相峙其下兩崖屹立如門

五磊山 延祐四明志在縣西北三十五里五峰累累相比

隱山 嘉靖寧波府志在縣西北六十里鄞令方軫隱於此故名

鳴鶴山 輿地紀勝在縣西北六十里昔有鶴棲於此一旦飛鳴冲天而去今有鳴鶴鹽場即此

浪港山 嘉靖寧波府志在縣西北七十里觀海衛

城負焉

瓜誓山 桑嶼山 箬舉山 廟山 嘉靖寧波府

志俱縣西北七十里大海中

向頭山 延祐四明志在縣西北八十里亦名西龍

尾東望伏龍山龍頭以東屬定海龍尾以西屬餘

姚二山捍潮其中漲塗漸與山相接古有海塘閘

柱屹然今為魚鹽之地

大忌山 成化四明郡志在縣西北八十里下有暗

石為舟航往來所忌嘉靖寧波府志舊在大海中
今近岸

小忌山 成化四明郡志與大忌山對峙

泥橫山 嘉靖寧波府志在縣西北一百里俗名掘
泥山在大海中今連大岸

東向山 算輿山 黃牛山 延祐四明志俱縣北
六十里

雁門嶺 嘉靖寧波府志在縣東北四十里通龍山

千戶所

長溪嶺 嘉靖寧波府志在縣西北六十五里溪行可五六里許北通鳴鶴鄉

石刺嶺 寧波府志在縣北一里石磴蟠紆迤邐接縣治

靈巖 天啟慈谿縣志在縣東北十五里石巖高峻俗呼為望海尖

慈谿江 名勝志源自紹興餘姚之太平諸山至丈

亭乃岐而為二大江由車廐歷西渡經府城之北至大決口入於海小江從東南貫縣城中由驄馬

橋出東郭一名管山江

慈湖

一名普濟湖

嘉靖寧波府志在縣東北一里唐開

元間縣令房琯鑿廣袤一百五十畝因縣名曰慈

以吳太子太傅閻澤舊居呼為閻湖

至正四明續志普濟湖在

縣東北一里吳太子太傅閻澤德潤居之謂之德潤湖後因寶謨閣學士楊簡敬仲居之謂之慈湖劉振之閻湖卽事詩秋容到處好碧水湛清輝嶺樹陰逾密湖雲濕不飛亭虛山易入野曠鷗忘歸

戶外塵雖滿耶能上芟衣謹按楊敬仲以慈湖自號非湖以敬仲所居始名至正志悞也

白洋湖

寧波府志與杜湖相連西界餘姚

詳見水利

花嶼湖

至正四明續志在縣東南一十里古有塘

瀦水唐貞觀十年刺史任侗修築計一十七頃四

十餘畝湖中有小墅春花明媚多於衆山故名

杜湖

嘉靖寧波府志在縣西北五十里唐刺史任

侗重加浚築宋慶歷初主簿周常築塘修閘

詳見水利

西羅浦

天啟慈谿縣志在縣西南二十六里羅仲

舒先生所居

松浦 嘉靖寧波府志在縣西北五十里

古窰浦 寧波府志在縣西北六十里

鷄鳴浦 嘉靖寧波府志在縣西二十里

黃家浦 嘉靖寧波府志在縣西南二十里

慈溪 名勝志舊名大隱在縣西南三十里純德錄

漢董黯早孤事母惟謹母疾思大隱溪水遠莫時

至乃築室溪濱板輿就養疾瘳乃歸因名慈溪

文溪 嘉靖寧波府志在縣東十五里受衆山之水

互見
鄞縣

漁溪 輿地紀勝在縣西四十五里清潭澈底鱗介
不潛

永昌潭 四明龍薈在縣西南四十四里舊名廣澤
潭唐天寶二年常遣使至潭投金龍窰以朱筆記
其左肋繼而雨降明皇目睹行雨龍左肋上有朱
畫及有大寶永昌四字遂賜宮名大寶潭名永昌

獅子潭 成化四明郡志在縣西南四十五里上有
石室三層高數丈及獅子足跡仙人藥臼

石人潭 成化四明郡志在縣西南三十五里

浙江通志卷十三